

**ZAKON O IZMJENAMA I DOPUNAMA ZAKONA O PREDMETIMA OD
PLEMENITIH METALA U FEDERACIJI BOSNE I HERCEGOVINE**

Član 1.

- (1) U Zakonu o predmetima od plemenitih metala u Federaciji Bosne i Hercegovine ("Službene novine Federacije BiH", broj 7/12) u članu 2. stav (1) iza riječi „proizvođači“ dodaje se riječ „dobavljači“, a iza riječi „obrtnici“, dodaje se riječ „ovlaštene“.
- (2) U stavu (2) u tački 10. riječi: „Savjetom za mjeriteljstvo Bosne i Hercegovine i“ brišu se, u tački 11. na kraju teksta interpunkcijski znak tačka zamjenjuje se tačkom zarezom i dodaje se tačka 12. koja glasi:
„12. utvrđuje ispunjenost propisanih uslova za ovlaštene laboratorije za ispitivanje i žigosanje predmeta, predlaže izdavanje rješenja o ovlaštenju i vodi registar ovlaštenih laboratorija za Federaciju BiH.“

Član 2.

U članu 3. u tački 11. riječ „utiskivanje“ zamjenjuje se riječima: „postupak utiskivanja“, a iza tačke 13. na kraju teksta interpunkcijski znak tačka zamjenjuje se tačkom zarezom i dodaju se tačk. 14., 15., 16. i 17. koje glase:

- „14. **ispitivanje predmeta** je postupak utvrđivanja sastava i čistoće predmeta;
15. **proizvođač predmeta** je svako lice registrovano za proizvodnju i/ili popravak predmeta i ima registrovani znak dobavljača i obavezu označavanja predmeta oznakom čistoće;
16. **ovlaštene laboratorije** za verifikaciju predmeta su pravna lica koja su u sistemu akreditacije u svojstvu ispitne laboratorije za predmete od plemenitih metala i koje su dobile ovlaštenje za rad od Federalnog ministarstva energije, rudarstva i industrije (u daljnjem tekstu: ovlaštene laboratorije);
17. **potvrda o usklađenosti** predmeta je dokument koji izdaje Zavod ili ovlaštena laboratorija kojim se potvrđuje usklađenost ispitanog predmeta sa propisanim tehničkim zahtjevima.“

Član 3.

U članu 12. riječi: „tehničke zahtjeve, biti označeni znakom dobavljača, oznakom čistoće i ispitani“ zamjenjuju se riječju „uslove“, a iza riječi „žigom“ dodaju se riječi: „ili potvrdom o usklađenosti.“

Član 4.

U članu 14. u stavu (1) iza riječi „Dobavljač,“ dodaju se riječi: „je dužan, po okončanju procesa proizvodnje ili uvoza,“, a riječ „mora“ briše se.

Stav (2) mijenja se i glasi:

„(2) Na rješenje iz stava (1) ovog člana, u roku od 15 dana od dana prijema rješenja, može se izjaviti žalba Federalnom ministarstvu energije, rudarstva i industrije (u daljnjem tekstu: Ministarstvo) u skladu sa odredbama Zakona o upravnom postupku.“

Član 5.

Član 18. mijenja se i glasi:

„Član 18.

- (1) Predmeti se ispituju i žigošu u laboratorijama Zavoda i ovlaštenim laboratorijama čije su kvalifikacije prethodno provjerene prema pravilima akreditacije i koje ispunjavaju propisane uslove u vezi s ispitivanjem i označavanjem predmeta.
- (2) Ministar će propisati uslove koje moraju ispunjavati pravna lica kako bi dobila status ovlaštene laboratorije.
- (3) Rješenje o ovlaštenju laboratorije za ispitivanje i žigosanje predmeta iz stava (1) ovog člana ne može se izdati pravnom licu koje je povezano društvom kapitalom i/ili ugovorom sa dobavljačem predmeta shodno članu 51. Zakona o privrednim društvima.“

Član 6.

Iza člana 18. dodaje se novi član 18.a) koji glasi:

„Član 18.a)

- (1) Ako Zavod utvrdi da su ispunjeni uslovi propisani članom 18. ovog zakona, na prijedlog direktora Zavoda, Ministar donosi rješenje o ovlaštenju laboratorije za ispitivanje i žigosanje predmeta.
- (2) Ako Zavod utvrdi da nisu ispunjeni uslovi propisani članom 18. ovog zakona, na prijedlog direktora Zavoda, Ministar donosi rješenje o odbacivanju ili odbijanju zahtjeva.
- (3) Rješenje iz stava (1) ovog člana se upisuje u registar ovlaštenih laboratorija, a javni dio se objavljuje na WEB stranici Ministarstva.
- (4) Protiv rješenja iz st. (1) i (2) ovog člana nije dopuštena žalba, ali podnosilac zahtjeva može pokrenuti upravni spor tužbom kod nadležnog suda.“

Član 7.

U članu 19. st. (1) i (2) mijenjaju se i glase:

- „(1) Ako laboratorija Zavoda ili ovlaštena laboratorija pri ispitivanju utvrdi da predmet ispunjava propisane uslove, označit će ga federalnim žigom ili izdati potvrdu o usklađenosti, o čemu sastavlja izvještaj i isti dostavlja Zavodu.
- (2) Ako laboratorija Zavoda ili ovlaštena laboratorija pri ispitivanju utvrdi da predmet ne ispunjava propisane uslove, uskraćuje označavanje žigom ili izdavanje potvrde o usklađenosti o čemu sastavlja izvještaj i isti dostavlja Zavodu.“

Član 8.

Član 20. mijenja se i glasi:

“Član 20.

- (1) Ako stranka nije zadovoljna izvještajem iz člana 19. ovog zakona može se u roku od tri dana od dana dobijenog izvještaja obratiti zahtjevom laboratoriji koja je vršila ispitivanje nedestruktivnom metodom, da se izvrši ponovno ispitivanje i destruktivnom hemijskom metodom o čemu se sastavlja konačni izvještaj i isti dostavlja Zavodu.
- (2) Na osnovu, konačnog izvještaja laboratorije koja je vršila ponovno ispitivanje, direktor Zavoda donosi rješenje o odbijanju ili rješenje o odobrenju žigosanja predmeta.
- (3) Na rješenje iz stava (2) ovog člana, u roku od 15 dana od dana prijema rješenja, može se izjaviti žalba Ministarstvu u skladu sa odredbama Zakona o upravnom postupku.”

Član 9.

Član 23. mijenja se i glasi:

„Član 23.

- (1) Troškove ispitivanja i naknada za žigosanje ili izdavanja potvrde o usklađenosti predmeta, te izdavanja potvrda za uvoz sirovina, legura i predmeta, dodjele znaka dobavljača i ovlaštenja laboratorija snosi podnosilac zahtjeva ili ovlašteni zastupnik.
- (2) Troškovi iz stava (1) ovog člana uplaćuju se u Budžet Federacije BiH na osnovu Zakona o federalnim upravnim taksama i tarifi federalnih upravnih taksi i Pravilnika o visini i načinu plaćanja naknada i troškova izdavanja potvrda za uvoz, ispitivanja i žigosanja predmeta od plemenitih metala.
- (3) Ukoliko je ispitivanje, žigosanje ili izdavanje potvrde o usklađenosti predmeta izvršila ovlaštena laboratorija troškove će naplatiti prema svom važećem cjenovniku.“

Član 10.

- (1) U članu 24. stav (1) briše se.
- (2) U stavu (2) riječ „Certifikat“ zamjenjuje se riječju „Potvrda“.

Član 11.

Član 25. mijenja se i glasi:

„Član 25.

Ministar će donijeti slijedeće pravilnike:

1. Pravilnik o sadržaju, obliku i dimenzijama federalnog žiga i potvrde o usklađenosti;
2. Pravilnik o sadržaju, obliku i dimenzijama znaka dobavljača i oznake čistoće predmeta od plemenitih metala;
3. Pravilnik o tehničkim zahtjevima koje u pogledu sastava, prevlake i izrade moraju ispunjavati predmeti od plemenitih metala;
4. Pravilnik o postupcima izdavanja potvrda za uvoz sirovina, legura i predmeta, dodjeli znaka dobavljača i ovlaštenja laboratorija za ispitivanje i žigosanje predmeta od plemenitih metala;
5. Pravilnik o visini i načinu plaćanja naknada i troškova izdavanja potvrda za uvoz sirovina, legura i predmeta, ispitivanja i žigosanja predmeta od plemenitih metala;
6. Pravilnik o službenoj iskaznici ovlaštenih službenika Zavoda za mjeriteljstvo koji vrše upravni nadzor nad predmetima od plemenitih metala.“

Član 12.

Član 26. mijenja se i glasi:

„Član 26.

Ministar će donijeti Uputstvo o ispitivanju i žigosanju, određivanju stepena čistoće i načinu obilježavanja oznakom čistoće i uslovima koje mora ispuniti dobavljač za dodjelu, odnosno evidenciju svog znaka.“

Član 13.

U članu 30. u stavu (2) riječ „dobavljača“ zamjenjuje se riječima: „ovlaštenim laboratorijama“.

Član 14.

U članu 31. stav (4) mijenja se i glasi:

„(4) Ministar će donijeti Uputstvo o obavljanju nadzora nad predmetima od plemenitih metala iz člana 30. stav (2) ovog zakona.“

Član 15.

Član 32. mijenja se i glasi:

„Član 32.

- (1) Ako se prilikom vršenja nadzora nad predmetima utvrdi da predmet ne ispunjava propisane uslove, direktor Zavoda donijet će rješenje o privremenoj zabrani prometa do uklanjanja nedostataka.
- (2) Predmet za koji je doneseno rješenje iz stava (1) ovog člana mora se odmah staviti van prometa, a Zavod će osigurati njegovo povlačenje u skladu sa uputstvom o vršenju nadzora iz člana 31. ovog zakona.

- (3) Ako se prilikom vršenja nadzora utvrdi da dobavljač predmeta ne ispunjava uslove propisane ovim zakonom i propisima donesenim za njegovo provođenje, direktor Zavoda donijet će rješenje kojim se stavlja van snage rješenje o znaku dobavljača.
- (4) Ako se prilikom vršenja nadzora nad održavanjem propisanih uslova za rad ovlaštenih laboratorija utvrdi da ovlaštena laboratorija ne ispunjava propisane uslove ovim zakonom i propisima donesenim za njegovo provođenje, Ministar će donijet rješenje kojim se stavlja van snage rješenje o ovlaštenju laboratorije za ispitivanje i žigosanje predmeta.
- (5) Protiv rješenja iz st. (1) i (3) ovog člana, u roku od 15 dana od dana prijema rješenja, može se izjaviti žalba Ministarstvu u skladu sa odredbama Zakona o upravnom postupku.
- (6) Protiv rješenja iz stava (4) ovog člana nije dopuštena žalba, ali podnosilac zahtjeva može pokrenuti upravni spor tužbom kod nadležnog suda.“

Član 16.

U članu 34. stav (3) riječ „Cerifikat“ zamijenjuje se riječju „potvrdu“.

Član 17.

U članu 39. u stavu (1) riječ „šest“ zamjenjuje se riječju „devet“.

Član 18.

- (1) U članu 40. u stavu (2) riječi: „i neriješeni zahtjevi za odobrenje ispitivanja i žigosanja predmeta u radnim prostorijama dobavljača,“ brišu se.
- (2) Stav (3) mijenja se i glasi:
„(3) Rješenja o dodjeli znaka odgovornosti za dobavljača, donesena od Instituta prije stupanja na snagu ovog zakona, podliježu usklađivanju sa odredbama ovog zakona.“
- (3) U stavu (4) riječi: „godinu dana“ zamijenjuju se riječima: „dvije godine“.

Član 19.

Ovaj zakon stupa na snagu osmog dana od dana objavljivanja u "Službenim novinama Federacije BiH", a primjenjivat će se nakon donošenja podzakonskih propisa iz čl. 11., 25., 26., 31. i 33. ovog zakona.